

四庫全書

集部

欽定四庫全書

集部

東里續集卷二十六

七

詳校官檢討

臣

羅國俊

中書

臣

劉源溥覆勘

總校官進士

臣

楊懋珩

校對官庶吉士

臣

嚴福

謄錄監生

臣

陳瞻燧

欽定四庫全書

東里續集卷三十六

明 楊士奇 撰

神道碑

戶部尚書古公神道碑銘

宣德二年二月十八日戶部尚書古公卒計聞上遣進士康琰賜祭命有司給舟歸其喪且營塋事既塋其子本奉禮部尚書蔚公所述事狀走北京介少保夏公求書神道之碑余與古公同朝三十年知其有廉清之操

諾而不辭公諱朴字文質號素軒古氏世家河南陳州  
諱義甫娶王生諱安道娶程公之大父母父母也以公  
貴公之大父父皆贈資善大夫戶部尚書大母母皆贈  
夫人公洪武中舉鄉貢為太學生奉命清理郡縣田賦  
圖籍丁父喪歸服闋隸五軍斷事理刑遂奏家貧願仕  
得祿養母太祖皇帝嘉之除工部營繕主事授承事郎  
迎母就養京師居無幾母沒官給舟歸塋服闋改兵部  
車駕司主事陞武選司員外郎授奉訓大夫再陞郎中

授奉議大夫遂陞兵部右侍郎授嘉議大夫太宗皇帝  
正大統轉左侍郎授通議大夫賜文綺襲衣上巡守北  
京侍仁宗皇帝監國嘗奉命權禮部兵部及詹事府洪  
熙中改通政使是歲陞戶部尚書授資善大夫賜誥命  
追贈二代遂謁告歸省墓賜鈔襲衣公事親孝非其義  
一毫不苟取居官臨事蚤作夜思勞勤弗懈一志於公  
無敢干以私者謹守祖宗成憲不肯踰越或言事久於  
時小過不及者亦當損益就中終不為動永樂中建北

京宮殿董伐木之役於江西有愛民之心竣事特被賜  
賚戶部主事劉良素行不檢滿三載公考其績下良叩  
上之左右人求公最考公曰貪侈之人幸未覺露不改  
行終當敗最考不可得也良遂誣奏公他事既就逮繫  
太宗皇帝燭其誣竟釋公他日吏部奏授良誥命封贈  
其父母仁宗皇帝曰愷悌君子福祿攸降是嘗誣奏大  
臣罪者其得為君子乎不與良卒以賊敗衆服公之明  
公所治職務退未嘗語其家人冰蘖之操確乎不移平

素不事生產華靡雕琢之玩纖毫不畜公退清坐一室  
書冊自娛嘗病士奇往問之入其齋室几案間獨有自  
警編一帙可以觀其所存矣洪熙誥辭有端厚簡靜操  
行清潔之褒蓋見知於上者深矣卒之日無銖累之積  
以遺子孫男三瑄璟皆先卒季本也女四賈瑩孔彰陳  
諫李怡其婿也孫男若干銘曰

古有恒言曰公生明何道而公其惟廉清廉之為行士  
分內事曷世由之什靡一二士行弗貞理曷由興嗟文

質甫為廉有誠厥廉伊何冰壺玉映迨其屬纊室類縣  
磬紛彼貴仕夏屋渠渠嗟文質甫歸兮焉居紛彼榮爵  
田亘阡陌嗟文質甫歸兮焉食其履湜湜其心休休污  
者之嫉清者之逮相彼貪人潢潦之溢崇朝而盈涸不  
待夕嗟文質甫皦乎不緇永揚休聞其在斯碑

故光祿大夫柱國少師工部尚書追封荏平伯  
謚榮襄吳公神道碑銘

公諱中字司正姓吳氏世家山東之武城業儒曾祖淵



祖興仕元為任丘令考成皆以公貴累贈榮祿大夫正  
治上卿少保工部尚書曾祖妣某祖妣某妣某皆贈夫  
人公洪武戊寅自國子生授營州後屯衛經歷陞大寧  
都司經歷太宗皇帝義旗初舉師至大寧公以衆出迎  
公潔白豐偉應對明暢上一見拔於群衆中賜襲衣命  
守會州教士卒力田南兵攻城率衆卻之移守薊州捍  
禦撫綏具有方畧賜衣服器物以嘉獎之遂命署北平  
布政司理問陞本司經歷給饗運贊城守並效勞績陞

大理寺丞是歲旱蝗公言此由刑濫所致皆臣等之過  
乞戒飭法司務寬平無幾陞少卿以發奸慝陞都察院  
右都御史將營北京宮殿改工部尚書奉命取材於蜀  
還又命董鑲運北京賜帛六百匹車駕北征公扈從魚  
督鑲運既還丁外艱歸起復仍命董宮殿營繕公言營  
繕吉事臣喪服未除非所當預改刑部尚書後以言事  
忤旨逮繫仁宗皇帝嗣位復刑部尚書改工部尚書命  
魚詹事進魚太子少保宣宗皇帝嗣位尤見信任陞少

保仍兼尚書賜寶帶金織衣已而坐累解少保公事三  
聖皆見信任凡車駕行幸不以遐邇皆在扈從三陵之  
建皆公董役竣事皆有銀幣之賜皇上嗣位以公舊老  
復少保重建奉天華蓋謹身三殿乾清坤寧二宮命公  
董之蚤莫勞勤致疾功成公雖在告嘉念厥勞陞少師  
賜白金文綺加繡麟衣無幾疾竟不起正統壬戌六月  
丙辰云訃聞輟視朝一日遣禮部尚書胡濙賜祭追封  
荏平伯賜諡榮襄命有司治塋官其子賢世襲錦衣衛

百戶公為人和易閭閻勤於奉公其掌刑憲寬厚平恕恒躬視獄中命除穢惡疏桎梏時食飲戒飭吏卒以時撫恤迨遷冬官職務填委規措經畫條理井井心之默識雖久不遺襟度有容雖忤不校或屈已伸謝愛護僚屬恒掩其疵其佐在南京者嘗賦造海艘材於江西浙江江西加數十倍時論譴譁公聞駭愕遽奏罷賦悉給於公屬官有器能者率獎進之先事蓄材以應時需隨用皆足未嘗缺乏自正統來京師多大營建悉出公家

有司不知百姓不聞此本皇上之仁亦公預贊畫焉明  
於燭姦嘗四鼓入朝道遇負鈔數十萬緡者公曰非寇  
而何命從者悉繫以奏詰之乃造鈔匠盜寶鈔提舉司  
鈔遂置於法邂逅有見必上聞不以出位為嫌歷事四  
聖皆承厚遇所得賜賚時鮮與儼宣德中嘗賜銀章其  
文曰和敏詳達蓋以貺公之行云所得書詩圖畫尤多  
自念久病奏乞停祿不允家居事親孝常迎就養京師  
備極崇奉親沒致御祭之榮永樂中命大臣之子入侍

皇太孫公推於其弟雖貴待姻戚鄉黨相與款洽如布素時賙窮恤匱不問識與不識與人處謙和怡愉大官中貴皆樂親之屬纊之日哀悼之衆無間疏戚享年七十有一塋良鄉縣某鄉之原配劉氏封夫人子男七皆側室某氏出也女三長嫁錦衣衛指揮李洪餘在室孫男若干余與公同朝交四十年至是賢奉少保江陵楊公所誌墓文求書墓道之碑遂益以余所知者序之而為之銘銘曰

奕奕吳公興自成均發軔伊始感會風雲共武之服從  
師于邁摠勤效謨夙夜靡懈乃進棘寺乃陟柏臺隆隆  
寵光亨衢弘開正法以施秉公持平遇災引咎帝嘉乃  
誠遂掌邦禁詰姦刑暴惟欽惟恤恭帝之詔再入冬官  
如古司空居民時利飭材考工鞠躬致誠歷事四聖陟  
降左右式恒厥敬廷多其績時偉其望巖巖師保六官  
之上曷不慙遺而遽長歸七十高齡於古已稀壽富考  
終亦既寧只史氏有銘詒厥來嗣

顯忠輔運推誠宣力武臣特進榮祿大夫右柱  
國太傅黔國公追封定遠王謚忠敬沐公神道  
碑銘

正統四年三月十八日黔國公沐公薨於雲南之楚雄  
計聞上悼念輟視朝加隆卹典遣官賜祭者再追封定  
遠王謚忠敬親王亦再遣祭其子護喪歸南京公卿文  
武群臣及所過方嶽大臣皆祭以薨之歲十一月廿六  
日葬江寧縣長寧北鄉觀音山先塋之次沐氏鳳陽定



遠人其先所自具前翰林學士王景所著黔寧昭靖王  
神道之碑王之高祖考曾祖考以昭靖貴皆追封  
黔寧王高祖妣曾祖妣祖妣妣耿皆追封黔寧王夫人  
昭靖四子伯諱春襲封西平侯歿諡惠襄仲即王叔昂  
右軍都督同知季昞駙馬都尉王諱晟字景茂自少氣宇  
閎厚端慤凝重聰悟過人而博學遠識恭慎寡言喜愠  
不形於色高皇帝重之既冠授後軍都督府僉事夙夜  
祇勤陞授特進榮祿大夫左都督時惠襄繼昭靖鎮雲

南甌王嗣封西平侯仍奉命鎮雲南王承父兄之後秉  
誠殫慮益弘遠圖威服德懷恪勵夙夜先是麓川不靖  
諸蠻逐宣慰使而分據其地王適至奏發兵平之復奏  
以其地置孟養木邦孟定三府鎮沅威遠二州于崖潞  
江灣甸大候者樂五長官司而歲徵其貢賦又於潞江  
之西置騰衝千戶所以控制之夷遂帖息太宗皇帝臨  
御之三年八百蠻酋侵邊王遣將先率兵討之躬率兵  
繼其後蒙自縣蠻聞王來遂遁進擒其酋誅之事聞賜

璽書白金勞王四年安南叛命征夷將軍率京師及湖  
廣等都司兵討罪命王佩征夷副將軍印充左副將軍  
率雲南等都司兵分道進討王率兵由蒙自經野蒲斬  
木通道以入先遣偏裨攻奪猛烈棚華關隘賊徒悉遁  
遂築堡駐兵造舟分遣諸將出宣光江口奪澳沕寺沙  
舁舟夜出洮水陣師遂遣將引兵沂流攻賊之富良江  
自旦鏖戰抵暮賊引却翼旦諸將咸欲奮擊王曰受命  
弔伐所欲得兇渠數人耳縱殺非皇上好生之心乃止

遂造浮梁渡師時征夷將軍大兵亦至廼合攻寇之多  
邦城柵繼搗其東西二都及盤灘困枚嚕江仙侶等寇  
悉破之寇首黎季犁父子狼狽棄其衆獨挈家屬及左  
右心腹遠遁於海王合征夷將軍兵追至日南州奇羅  
海口擒俘無遺械送京師凡得郡四十八縣百八十六  
戶三百十二萬五千九百獲象馬牛畜軍資器仗安南  
平六年春班師入朝賜號顯忠輔運推誠宣力武臣特  
進榮祿大夫右柱國封黔國公食祿二千石賜誥券玉

帶金幣命子孫世襲既大宴上親製詩褒嘉又日賜宴  
於便殿還鎮雲南是冬安南餘寇携貳命王佩征夷將  
軍印總兵討之王師壓境寇遁入乂安海島追至占城  
之境擒寇首陳季擴阮帥鄧容等送京師誅之師還仍  
鎮雲南十七年富州蠻酋積逋賦不入朝廷命王發雲  
南貴州兵討之蠻據嶮以抗王遣兵斷其後諸將請急  
攻王曰威服不若德服遂使人諭以禍福蠻即遣子詣  
京師謝罪悉償所逋仁宗皇帝嗣位重王勲德老成詔

兼太傅召至恩禮加厚遂命佩征南將軍印還鎮宣宗  
皇帝初嗣位遣使齎璽書及金幣勞之皇上嗣位恩禮  
視宣德之初明年改元正統賜金幣加厚是年冬四川  
會川黎溪蠻合底泊等蠻為亂奏遣弟都督昂討平之  
二年冬馬龍他郎甸蠻不靖復奏遣昂平之三年麓川  
思任發擾邊侵掠騰衝南甸遣人諭之不下奏躬率兵  
討之兵至潞江王勉諸將曰出兵尚謀不專恃勇且逼  
瘴月非用武之時今官軍已集如賊能畏威悔過摠誠

謝罪請命赦之斯亦可也遂復遣人諭之不下乃命弟  
昂及都督方政等率兵前進王尤戒其慎重時王整兵  
在後政等乘夜渡江破賊柵賊衆奔北官軍乘勢追至  
景空等寨斬首三千餘級獲象三十餘政奮勇獨進賊  
伏兵四發政力戰死之時春巳半王慮瘴發非官軍利  
遂旋師將駐金齒會有旨命王還鎮王至楚雄疾遂薨  
方疾革時顧弟昂曰吾父子兄弟受國家天地罔極之  
恩吾不能報矣吾弟勉之吾一家子子孫孫世堅忠誠

保臣節無忝君親又顧昂曰斯役也雖偏將失利固吾  
總帥之過此賊必不可貸汝勉之勉之言訖而逝歸櫬  
所過道路城郭無貴賤大小迂拜哀慟蓋王在鎮久惠  
愛之被於下者深也王忠孝之誠本乎天性無或弗盡  
與子弟言亦惓惓斯道友二弟甚厚教子孫動以禮法  
家政秩然位極人臣而禮賢重士虛已聽納寬裕有容  
未嘗面及人過凡文武屬吏有過者惟恐王知務自掩  
蓋其因自悔徙行者亦多王明於韜畧然以仁為主蠻



夷有罪未嘗輒加兵誅必諭導使改數諭弗悛乃奏發  
兵逮兵入境若夷能知懼悔罪亦曲貸之與之更新雖臨  
戰陣必戒麾下毋縱殺戮賞罰明信威愛並行至於完  
城池飭武備訓將士理屯田通水利實倉庾恒謹成法  
若輕徭賦問疲瘵尤勤致意學舍獎陋具材儆工葺之  
不以煩下治公有暇手不釋卷稽古明道動師昔賢蓋  
從容具文武之才仁義之帥也配程氏先公謝世追封  
定遠王夫人子男一儼襲封黔國公溫雅謹重恪循家

法女二長冊為趙簡王妃次適武定侯郭珪孫男一玘  
女一在室至是王之子以事狀求余書神道之碑謹按  
狀叙而銘之銘曰

天啟皇明於淮之右配天與地篤生帝后二聖至仁作  
民父母心存萬方包含徧覆矧孤在里靡攸怙恃二聖  
矜惻曰其子子鞠之誨之勞劬備周以長以成有偉才  
猷帝有恩言爾復爾氏懋乃樹立華乃先祀嗚呼昭靖  
盛德豐功皎日之誠持孝與忠嗚呼忠敬續乃烈考惟

孝之軌惟忠之蹈發軔都府簡在宸心夙夜弗遑秉其  
慎欽往綏滇人幾五十年率考之行數帝之恩俾食俾  
衣免其寒飢重學崇師導之尊卑平其政令時其作止  
人戴惠慈淪骨浹髓有或弗惠以諭以誨游誨弗悛式  
劉以戒交人悖兇披猖為狂違天毒氓軼我邊疆奉詔  
出師往行天討桓桓疾馳雷驅電掃富良飛渡如履坦  
途兩師窮追縛寇海隅解縱脅從宣布教條爰整師旅  
凱歌歸朝飲至策勲上公錫爵嘉寵元臣龍章輝灼滇



人之思瞻望旆旌帝不忘遠申命南行祇事五朝鞠躬  
小心奉國忘家志如堅金寸棘未剪躬不寧處過自偏  
裨於躬引咎終於王事德善孔多顯顯華褒千歲弗磨  
沐世子孫奕奕象賢篤忠與考永光其傳

奉天翊運推誠宣力武臣特進榮祿大夫柱國  
鎮遠侯追封夏國公謚武毅顧公神道碑銘

永樂十二年五月廿五日鎮遠侯顧公薨於貴州計聞  
上震悼遣官賜祭追封夏國公賜謚武毅賻贈如制命

有司治喪葬遂命其嫡孫興祖襲爵興祖奉柩歸葬於揚州之某原顧氏其先居湘潭公之曾大考百四妣某氏大考千二妣朱氏始家江都考萬一妣周氏公諱成字景韶天性仁厚自少能矜恤癯孤負直氣遇以橫逆加人者必摧辱使畏服乃已其大考嘗詫於衆曰是孫必興吾門公姿貌魁偉涉知書通大義而膂力絕人善武事尤精騎射命中元末嘗遊燕都有強寇十數劫其舟同載者皆驚愕公獨奮出鬪寇皆披靡走既歸張

士誠起泰州僭王號公知其無能為乙未歲我太祖高  
皇帝渡大江明年公來歸附至鎮江偕驍勇士十一人  
轉鬪入城莫敢嬰其鋒者既敵益衆而援絕悉為城中  
人所繫十人者皆被殺公奮躍起繫絕蹴持刃者仆之  
脫走歸語衆曰鎮江城中皆庸夫可取也遂導衆攻其  
城克之授百戶從攻常州宣州皆克之簡克旅正還從  
克江陰從寧河王克通州陞千戶攻雙刀趙於樅陽攻  
安慶江州池州興國諸山寨皆下之庚子敗陳友諒兵

於龍江公得其戰艦及馬特賜白金友諒退仍據安慶  
江州公隨大將軍悉復之并得其八陣營諸寨從克南  
昌援安豐敗元兵進攻廬州從克武昌荊州衡州從開  
平王下襄陽還取泰州留守興化從中山王破舊館克  
湖州蘇州洪武元年陞堅城衛指揮僉事二年領軍克  
信陽唐光四年從臨江侯取西蜀道遇敵公手殺敵百  
餘人生擒二十餘人進攻羅江生擒其僞元帥及其下  
二十餘人悉送軍門斬以徇入漢州僞官戴丞相向知

院者盛兵迎戰公揮衆奮進戴向皆狼狽還走追北至成都圍其城竟降之蜀平調成都後衛總帥以公守之六年率兵赴重慶擒妖賊王元保及偽萬戶李邦祖等八年調貴州衛明年甕傍等山寨蠻寇叛公率兵討之斬首百餘級俘獲人馬尤衆夷懾服叩首請歲納租賦公從之其僻遠山峒有負固未下者次第平之已而群夷叛服不常公連歲出兵平之前後俘戮不可勝計十四年從潁川侯征雲南公率步騎兵為前鋒首克普定



留公守之且為後繼公部分將士樹柵以守明年公出兵克西堡於是諸蠻合數萬攻圍普定諸將皆欲出戰公持不可曰賊衆我寡一出即為賊所窺必俟其攀柵乃出賊及柵公披甲上馬出北門率戰士奮進手殺賊騎之迎戰者十數人賊衆引却諸將遂乘勝出東西門戰敗賊衆時南門之圍未解公取所生擒者十八人斬之而縱其一人歸曰吾以夜二鼓盡殺爾矣及期賊聞官軍舉銅角銃鉞皆惶懼奔走圍悉解獲賊兵甲無算

時有中使在普定見公勇畧絕群還奏特遣賜龍衣金帶陞世襲指揮使凡普定所隸諸蠻公悉平之十七年平阿黑螺螄等十餘寨及降尾洒蠻酋馬乃之衆西堡蠻携貳復平之廿一年總戎檄公討平乖西扒古里谷勞金網等寨遂擒關索嶺首賊葛蓬及叛賊阿東皆誅之土官阿宗叛焚劫驛舍乘虛將攻公勢張甚時官軍精銳悉駐東川公率餘衆及土兵深入賊地據關口屢敗之賊既遁衆以暑瘴非士卒便欲退師公不聽未幾

賊黨殺阿宗降遂奏革普定府而黜其守之懷二心者  
建兵衛以屬其民析其地為州三長官司六而公統理  
焉自是公悉意撫綏大布恩信諸夷嚮服廿五年夏入  
朝賜文幣二十有副鈔三千貫白金四百兩日錫宴會  
同館陞鎮國將軍貴州都指揮使司同知公至貴州首  
征康佐叛蠻破阿老諸寨峒廿七年平都勻豐寧西梁  
瓦材等寇斬首萬四千餘級俘生口三千八百有奇而  
撫其良善二十九年陞驃騎將軍右軍都督府僉事官

其長子統普定衛指揮使是歲命公佩征南將軍印總  
兵征水西叛寇生擒其首敬德斬之餘寇悉降三十年  
五開蠻反公率兵搗臻剖六峒悉破之進勦天柱天堂  
春花金井蒲頭大小坪等生苗及螃螬米毫灣溪舟溪  
萬潮等寇皆破之三十一年普定西堡及貴州光金谷  
勞龍里金石番羨唐諸夷復叛公次第親行誅其叛首  
而撫其餘衆既歸明年高廟上賓又明年太宗文皇帝  
北平之師起藩國公受命往禦至真定北平之帥繫公

以獻文皇識公先朝舊人解其繫與之語曰豈非皇考  
之靈以汝授我乎因語以不得已興師之故言已泣下  
公亦泣遂遣人護送北京令輔仁宗皇帝居守時姚廣  
孝奉命輔居守有腹心之寄姚素不習兵事與公議多  
不合會南兵圍城仁皇於軍旅調度恒從公言城中文  
武之臣競進曰顧成南將其中叵測不可專任然公所  
言計皆合機用皆有效數命公出將兵固辭曰使臣侍  
左右日陪論議得效分寸足矣賜公甲冑刀劒弓矢皆

不受南兵數圍城卒以敗去者多用公謀也洪武三十三年九月論公功賜號奉天翊運推誠宣力武臣特進榮祿大夫柱國後軍都督府右都督封鎮遠侯食祿千五百石子孫世襲賜鈔三千貫白金三百兩綵幣三十加副遂賜誥券是冬命公鎮守貴州蓋以公威信素行於彼云永樂元年春至貴蠻夷聞公至歡趨出拜叛者皆歸境內靖寧公上書論大計謂國家宜早建儲以正名分北邊官軍有功者爵賞既定宜制以禮法降勅褒

答賜鈔五千貫綵幣八加副中賜鈔萬貫白金二百兩  
綵幣如前三年賜誥追封三代考皆鎮遠侯妣皆侯夫  
人永寧土官宣撫為其弟謀殺致其下亂公執其弟送  
京師罪之而從土俗奏以宣撫妻襲職其衆遂靖六年  
車駕將巡狩北京豫召公副儲君監國既至上慰勞再  
四且諭所以召公之意公言皇太子孝友仁厚恭勤明  
達足任付託且左右文武之臣其知識深長皆非愚臣  
所及蠻夷雖今帖服小有競爭即持兵為亂愚臣非敢

決意去留惟陛下命之上忖知公意嗟嘆累日賜鈔四萬貫白金二百兩綵幣三十六有副命還貴州陞辭退辭文華殿曰殿下於事君父恤兵民素行有誠惟於小人當寬度外萬事有天理不足計蓋是時懷奪嫡志者不樂公在京師公燭知故先幾引去也時土官奏欲為公建生祠從之公之赴召也播州貴州蠻作亂公歸遣子勇率兵勦之悉平時思州臺羅等蠻亦亂公遣人諭其酋普亮即服於是公病事聞遣醫馳視又遣公之孫



齎勅勞問賜鈔三千貫公疾稍間親率兵討清水江叛  
寇平之臺羅蠻復叛公親勦之俘戮幾盡既旋師公疾  
復作其下以聞復遣醫馳視竟不起春秋八十有五公  
自少壯履行陣挺身戰鬪奮勇無前雖身被十數創不  
稍引却必致俘馘見功效深於籌畧料敵制變百不爽  
一於謀國事明大體不瑣屑細故竭誠奉公至老死不  
倦諸葛公所云鞠躬盡瘁死而後已者公蓋有焉朝廷  
既追封公并追封公三代考皆夏國公妣皆夏國夫人

元配彭氏再追封夏國夫人繼室穆氏李氏子男七長  
統先公卒洪熙中以其子貴追封鎮遠侯次銑次銓次  
銳次勇累官貴州都指揮僉事次亮次源銑亮亦先卒  
女六陝西都指揮同知黃庸普定衛指揮同知李傑永  
寧衛指揮僉事徐震普定衛指揮僉事李庸貴州前衛  
指揮僉事李宣貴州前衛指揮僉事王綸其壻也孫男  
九興祖襲封鎮遠侯效用三朝克繩祖武凱再興德旺  
興能貴州衛指揮同知先卒琮琦珪曾孫男六玄孫男

一至是興祖具事狀屬士奇書公神道之石士奇永樂  
洪熙中官翰林日侍二聖實聞公事故不辭敬次第書  
之而係以銘曰

大明奉天肇跡淮土公奮從龍來歸皇祖金戈鐵馬桓  
桓四征鏹暴鋤彊疇之敢嬰函夏既寧報功錫命崇爵  
豐祿往綏南境逖彼南境毒虺妖狐憑阻弗馴跳蹶嘯  
呼公奉天威霆驅電掃夷藪室穴屢征乃妥乃登督府  
乃衛禁垣居無幾何迺北其轅天其祐公俾作聖輔惟

聖知公曰時舊老明明二聖任公心腹蓄疑盈庭公任  
愈確公不人尤公處有道秉誠執恭謀猷屢告卒底厥  
功為報益隆金貂玉輦亞於上公帝謂爾成予懷南徼  
汝往申撫公拜奉詔夷獠逐公父母歸止焦者以濡仆  
者以起孰其悖兇敢干刑誅小者擒俘大者戮屠公身  
在外心存廷陞匪有陳皆國大計當宁聖明嘉公忠  
言寵賚華褒誕降自天國有老成謂宜百歲曷不憊遺  
營星奄墜雄蓋萬夫智名勇功公福簡簡哀榮始終慶

澤之貽綿綿來嗣篤念先祖祇於世世

李氏先塋之碑

永樂元年太宗皇帝既褒封奉天靖難功臣遂及城守之功文武之臣以次叙進前北平布政司右叅議李友直陞北京刑部左侍郎歷十有八年改工部左侍郎仁宗皇帝臨御之明年賜勲資治尹授誥命贈其祖彥名考人義皆嘉議大夫資治尹工部左侍郎祖妣臧妣杜皆淑人既而追惟舊勞特陞友直北京刑部尚書申錫

誥命加贈其祖及考皆資善大夫北京刑部尚書祖妣  
妣皆夫人友直虔奉命書薦告畢出而言諸士奇曰友  
直德薄能少何足以膺承寵榮隆盛之如今也哉惟二  
聖大德如天有以施及之也亦惟先祖考妣務善施仁  
歷久而積厚甘處晦默以遺諸其後也友直其敢忽忘  
所自哉將樹石先考妣墓道載上之所以寵我暨先人  
之所以敷遺我者以永示李氏子孫願為我書之按李  
氏保定清苑人累葉載德至彥名益裕於貲而樂施濟

汲汲恐不及蓋春秋七十有二而卒配臧七十有五卒  
三子人德人義人厚人義承家世富饒然自用儉薄而  
好施肖其父其所及人益厚平居睦族樂賓篤子姓於  
善而已洪武辛巳某月某日卒年六十有二葬其鄉柳  
林社配杜於相夫教子理家咸適於宜某年某月某日  
卒年七十有五合葬於夫之墓二子友直友亨孫男四  
昉暉暘映女三銘曰

維木有本既深且固達於榦枝厥崇孰禦德善所施積

累既多必有達焉紛敷其華清苑之邑豐穰之鄉奕奕  
李宗篤行垂慶文皇奉天義旅肇興李有明智先幾據  
誠更嶮涉巖鞠躬惟一論報之隆豐祿崇秩歷事二聖  
冠纓在廷弗競弗柔渢渢聲稱惟聖念之亦既勞止有  
聲必先仁其祖禰雲章龍文煌煌自天命服之褒寵光  
九原松柏桓桓丘墳戢戢燎黃薦告聚望歆嗟承君惟  
忠承親惟孝視勸後來琢詞墓道

東里續集卷二十六



欽定四庫全書

東里續集卷二十七

明 楊士奇 撰

神道碑墓碑銘

工部尚書李公神道碑銘

太宗皇帝初奉藩北京建文中廷臣有因齊藩不法遂  
建議凡藩國所在更置守臣於是擢張昺為北平布政  
使昺至日求王府細事將為不利其史李友直密聞於  
太宗義師既舉遂擢用友直友直質樸直諒知無不言

甚見嘉獎日益信任出理饌運入嚴城守率以命之殫  
力竭慮事率蚤集而咸稱上旨初授北平布政司右叅  
議既建北京改布政司為行部陞左侍郎時初作宮殿  
營繕務殷專經度提督躬任勞動蚤莫弗懈改行在工  
部侍郎仁宗皇帝臨御嘉念舊勞陞行部尚書奉命代  
祀周文武成康陵及秦愍王既還言關中民瘼深見嘉  
納賜誥命并追贈祖考妣請告焚黃遂立碑于墓以侈  
上恩昭先德宣宗皇帝嗣位改行在工部尚書嘗奉命

董採鍛材於蜀設施有方綏撫有誠勞者不怨自是朝廷凡有興作重役悉以委之其臨事有條理而體卹下情所行悉公是以人從事集訟誹不興而屢承勞錫焉友直字居正為人坦夷聞敏雖不與物競而持已正直亦不屈於物有恤人之心施濟弗吝與人言必歸於忠厚有之官往辭公者必勉以愛民之政與人交惻款緩急率得其力度量有容屬司之貪詭者以公長者數欺慢之公雖知弗校清議以是益重公春秋七十而卒正

統三年某月日也訃聞上賜祭命工部營奠禮部賜祭公卿以下皆往祭之李氏之先隴西人元季其曾祖山徙保定清苑自是以來皆隱處不仕而篤於善行祖彥名考人義皆贈資善大夫北京行部尚書祖妣臧妣杜皆贈夫人其元配臧贈夫人先十七年卒繼劉及王皆勤內助子男三昉暉暘女二長歸府軍前衛指揮使徐震次歸保定右衛指揮同知王原孫男四女二曾孫男四諸子將捧匱歸厝清苑先事昉奉吏部尚書郭公所

述事狀詣予請文於神道之碑余嘗銘其先塋矣然與  
公同事四朝雅相好相知故不辭為叙而銘之銘曰

遥遥隴西李所自來徙清苑屬元季豐穰之鄉柳莊里  
土剛水清毓和粹繇曾大考暨祖禰積仁累厚襲休祉  
式生居正用奮起攄厥純誠奉藩邸義旅之興殫勞瘁  
高城浚池固根底聯車連艦給饗餽左馳右驅效謀智  
乾坤既正廓氛翳煌煌天寵峻祿位藩垣超陟冬卿貳  
冬卿申陟極所至持身莅務嚴劾必肅肅在公靡怠易

執信秉仁處當義恤窮矜鰥急施濟量度恢豁內昭晰  
有詭罔之弗校計恭事四聖誠一致七十全歸行靡愧  
必有紀述垂後世故鄉之墳歸率制疇其銘者太史氏

光祿大夫少保戶部尚書黃公神道碑銘

自古仁人君子之明夫道者恒以天下國家為心而不  
為其私計范希文言士當先天下之憂而憂後天下之  
樂而樂夫天下之大懷抱斯志者未嘗無人顧其志得  
行與否則係於其所遇以希文之志猶不得盡行於當

時非所遇之難乎惟士之卓然有志者則不以是而或  
怠然亦鮮矣三四十年間士奇所接名卿大臣若東萊  
黃公其可謂有志於希文而無愧者也公稟剛毅之資  
持正直之節懷忠厚之志負遠大之器風采凝重氣量  
宏偉而表裏洞達博學好古篤信不疑不苟為同不矯  
為異不為勢屈不為禍懾惟義之循惟道之行豈非士  
之卓然者歟公東萊昌邑人其先世見余所作墓碑公  
諱福字如錫自少不凡以書經選洪武甲子鄉貢入太

學初授項城縣簿改清源縣皆有及民之政陞金吾前衛知事改龍江左衛蚤莫勤職而才識明敏剴剔宿弊數出意見輔翼上官陞本衛經歷上書論國大計太祖皇帝覽而奇之超陞工部右侍郎特見信用太宗皇帝初臨御治齊黃離間之罪李景隆於上前并指公為姦臣公厲聲言臣罪應死但目為姦則非上知其正直不問遷左侍郎遂陞工部尚書投資善大夫凡所陳奏悉見嘉納歲餘天下工匠集京師者多疫死都御史陳瑛



以為公罪劾奏之又不問初建北京置行部時北方用兵累年民弊甚首改公為行部尚書任之撫綏公據誠盡瘁植什濡焦而民以蘇交趾逆命遣大將軍率師討罪命公先詣兩廣治軍實調度有方用足而民不困交趾平郡縣其地建都指揮司布政司按察司總之設官如制命公以尚書兼掌布政按察二司印章而董其治公視民如子徇其所欲革其所惡勞之輯之訓之飭之躬勤不倦且戒郡邑吏咸修撫字之政吏承公仁無敢

違戾公以新造之邦新附之民政令條畫靡間纖鉅悉盡心焉於是交人益戴公如父時中朝士大夫以遷謫至者咸見溫恤或有疾病躬造視之拔其賢者與之共事及以教導其民而悉加禮焉中官馬騏怙恩肆虐自三司以下皆縮首歛避惟公數裁抑之騏誣奏公有異志上深照其妄曰此君子不容於小人寢其奏公居交趾幾二十年仁宗皇帝登極上言六事悉見采用時初建儲驛召公還璽書有元老久勞于外篤念不忘亟欲

見之之語瀕行交人扶老攜幼送公皆號泣不忍別既至深被獎勞賜白金文綺遂命無詹事蓋付託之重云賜誥命追贈三代無幾仁廟上賓公董山陵之役宣宗皇帝嗣位馬騏激變交趾時兵部尚書陳治代公掌藩臬二司累奏乞還公益以交人思公之深公先已持節親藩冊封即日召還奉命復詣交趾時交寇黎利據列城叛朝廷命將率師討之及公偕行將及境交寇拒師總師者失律為寇所得并得公冠皆下馬拜公曰公不

北歸我曹不至此言已皆泣共置公於館父事之公度  
寇無悔罪意即不食冀死寇謹防護不去側竟禮送北  
歸既歸奉命偕平江伯陳瑄董江南餉運公與平江協  
心合謀績用有成公上言足食足兵省役三事切於時  
務並見嘉納宣廟念公春秋高久勞在外改南京戶部  
尚書上龍飛之初以南京根本重地公先朝老成進榮  
祿大夫少保仍兼尚書叅贊襄城伯李隆南京守備公  
時雖老事無鉅細必周于慮而裁處適當襄城惟公言

之聽文武諸司凡有疑務咸就正焉於時南京政肅民  
安蓋倚公為重朝廷下璽書事關幾密者公必預焉賜  
誥命授光祿大夫加贈三代又上言學校田賦鈔法鹽  
法官俸數事多見施行正統四年冬得疾日加猶時強  
起議公務明年正月五日薨公卿以下奔走哭弔計聞  
賜祭命有司治葬賢士大夫皆傷正人之沒以為世道  
惜公自小官至一品始終以國家生民為心嘗取希文  
語名其退食之堂曰後樂臨大事決大議衆或嬖姁公

獨奮斷衆或辟易公獨邁往人有善告樂從如流斥姦  
關諛無所顧忌下人有過多見優容所與交游必輔於  
道憂國忘家老而彌篤所得俸賜率分族姻屬續之日  
室無百緡平生立心行事一以不昧天理為主享年七  
十有八葬昌邑西新郭之原曾祖佑志祖谷保考士中  
皆賜光祿大夫少保無戶部尚書曾祖妣倪祖妣李妣  
王皆贈夫人配王封夫人子男五瑾琮琬玕女二長  
嫁逢祀次嫁葉清清侍公交趾先卒清妻孀居十八年

亦先公卒孫男二愷懌士奇與公同朝四十年晚辱公  
知甚厚未幾之先歲余蒙予告歸江右道過南京公時  
有疾首造焉躍然起執余手論國事娓娓不片語及他  
嗚呼言猶在耳安得復見正直憂國如黃公也哉瑾求  
書公墓上之石敬叙而銘之銘曰

維天之仁生賢與才上以輔德下以康時士之高明識  
道在我我祇行之其敢佚情萊有黃公桓桓其資于道  
克明行之弗疑遭逢列聖既五十載崇爵重秩踐敷中

外靡遑夙夜靡間寢興單智畢慮顙顙用誠益下以惠  
益上以德敷厥謀猷亶時正直凡民被疾猶痛在我民  
既有瘳我食斯下南交初附詔公拊循育之訓之朐其  
春溫交人戴公曰我父母有詔歸公如去恃怙肅肅其  
度內直外方不茹不吐推賢薦能先哲所存後天下樂  
公實承之秉執有確國之有公柱石在堂士之仰之如  
霍與衡爵圭林林疇並公志遽不憇遺匪時之嘅

孫先生墓碑銘



正統五年五月二日豐城孫先生沒先生諱貞字宗正  
號竹軒孫氏唐興元中曰瑤者自江左來豐城卒葬邑  
之同造里數山子孫始家豐城至南唐曰行琰者嘗移  
書節度使馬希萼去兵弊民賴之子孫益盛代不乏聞  
行琰六世孫發宋元祐進士為永豐縣令又九世至實  
則生祐卿幼孤鞠于李氏姨遂冒李姓生仲明先生之  
曾大父大父父也先生資稟不凡幼嗜學邑大夫簡亢  
博士弟子時泰和經師劉子彥為學諭器重之授以毛

氏詩後卒業於文淵閣大學士朱備萬進士黃德潤之  
門升太學生中京畿鄉試明年會試中教官選除紹興  
府學教授正己以率生徒而致勤教事有御史挾勢欲  
壞法以濟私者先生固執不聽諸生日益見成效有明  
許負術者謂先生憂色見即心動白于上官歸省將至  
家聞父喪哀毀踰制服闋改漢陽府學凡所設施如紹  
興而諸生有成倍之九載績最陞國子助教盡心教事  
不改教授時遂奏復孫姓祭酒胡公司業吳公皆遣子

從之學改博士陞七品祿間祭酒司業闕推先生署監  
事洪熙中賜誥命母年八十先生亦六十餘奏歸省遂  
懷退休上疏乞解官侍養時子曰恭官翰林即援棄職  
就封之典授翰林編修文林郎致事既歸蚤莫不去親  
側自守益嚴非公事足跡未嘗及縣庭歲大比諸藩聘  
主文衡咸辭不赴母沒築室數山之下居焉鄉俊秀願  
授業者不拒皆傾底裏授之而貧者不責其禮善教子  
各授一經其三發身科目一守重慶一教祁門先生之

退居數山也皆迎就養喜曰吾將往觀其所治教而進益之既至又皆喜曰庶幾無忝哉皆為留或再歲或數歲而後歸先生兼通諸經尤長於詩春秋文章和平暢達有竹軒集若干卷慎交處明知人所舉薦士如按察僉事張某輩皆執守介特有聞於時先生負治才臨事條理井井惜其止於教職未大展布也平居事親孝處族姻朋友厚在太學遇故人子憂患艱難周卹之雖久不厭有出獄而病困欲來依者排衆議而庇之不苟附

勢初與夏原吉盧淵李慶最故及夏李為尚書盧為侍郎先生時官太學未嘗一及其門家積書甚富市肆所闕者率手自抄錄雖老不廢學居心端謹自用儉約諸子仕者每遇所得祿賜歸為奉養之資悉不啟封而還之且書戒之曰汝留養廩吾不乏此諸子仕外者未嘗需及一物蓋慮墮其守也凡所慮深遠故歷官三十餘年坦坦一致晚而退休講道之餘日與二三故老宴遊談笑無毫分外物入其思慮一日杖策出觀江漲道過

故人清論如平時莫歸無疾而卒享年七十有五配揭氏元文安公族孫封孺人子男五長曰溫次曰良舉進士自監察御史陞交趾重慶兩郡守再陞廣西右布政使曰恭進士及第自翰林編修陞修撰再陞侍讀曰儉先卒曰讓舉鄉貢會試選中教官自祁門縣學教諭陞應天府學教授仕者皆卓卓有賢名女二范迪熊仕恭其壻也孫男十五女十曾孫男二女五諸子遵治命奉奠于敷山先塋之次曰恭走北京以其同官劉某所具

事狀屬予書墓上之石予與先生同朝三十年去年南  
歸先生攜酒迓予於江潯相得惟甚酒數行遽別時先  
生體力康強神采清明予喜先生之福未艾也豈謂踰  
年而遂永訣耶敬叙而銘之銘曰

豐水之濬代有聞人道德與文炳乎振振皇明龍興續  
武則有繫孫先生顯顯授受鑽研羣經職任教事繇頻  
而國畢效勞勩有確厥守有卓厥志有宏厥才未達于  
施其秉之義其存之仁以付厥嗣以被于民嗟孫先生

道既行矣生而壽康沒亦寧矣敷山之原我我者墳士  
奇銘之以續前聞

贈資善大夫戶部尚書兼謹身殿大學士陳公

墓碑銘

戶部尚書兼謹身殿大學士陳山蒙恩追贈其大父父  
皆資善大夫兼謹身殿大學士大母母皆夫人山祇奉  
命書薦告已狀其考之行屬士奇文諸墓石按狀陳始  
自長葛徙南劍之沙縣族既盛遂析為三而上世皆有



顯仕其居廊口白泥里者在宋曰世卿事太宗真宗終  
秘書少監知廣州有傳在國史子中儼駕部郎中郎中  
五世至諱智智生天麟天麟生諱祿其考之曾大父父  
也母范氏其考諱某字某生晬父喪而家落母躬勤教  
育之時資助於舅氏十餘歲智識日長駸駸能卓立治  
生產有條理為鄉黨所稱既冠家益饒裕擇勝徙居邑  
之西為人重義喜濟施急人之急通醫術凡有求者趨  
赴之不間風雨蚤莫多所濟活道圯梁壞率發帑廩修

治以便行涉性剛直遇私競爭不平公其是非未嘗毫  
髮苟徇言出靡不服者里中有陳公道之號諸子皆長  
恒勵其學業有秘書故第在屢諭諸子曰此吾先世力  
學所致汝曹不務圖繼可乎晚作別業於邑之北有園  
池之勝日偕朋從宴聚歌詠其中一切富貴憂虞舉不  
足以干其念慮洪武戊辰十二月二十一日卒春秋六  
十有六葬從門西山之原娶朱繼黃子三男三女皆黃  
出男長石次山次虎莊汝爵蘇必昌盧均賢其女之壻

孫男四璟炯珪夢琴山明經舉鄉貢歷郡縣學官擢吏  
科給事中遂以文學侍今上於春宮進左春坊左庶子  
戶部左侍郎遂進尚書兼大學士寵遇益隆其為庶子  
侍郎皆蒙恩贈父母以已之官秩至是而追榮之命三  
加矣非公濟施之應乎若公所舉先世以勵厥子者亦  
既成其志矣士奇與山館閣同寮又交久誼不可辭銘  
且聞陳同忠肅公族也謹叙而銘之曰

陳徙劍沙昔有顯聞堂堂忠肅正氣凌雲同本殊幹為

材匪異族出既同道固一類或仕而著或隱而微相望  
輝映厥位與期侃侃陳公所秉剛直是非以公作其挺  
特惟志在民利安是圖人有弗寧不步而趨亦既不處  
弗閔厥施忠肅所存公存有似恬澹怡愉韋布終老仁  
厚所鍾有子光紹遭逢十歲升列六卿駢蕃寵秩嘉榮  
所生麗牲有石歸焉墓道史氏作銘來裔是告

故資政大夫兵部尚書兼詹事府詹事金公墓

碑銘

永樂十三年四月十五日兵部尚書兼詹事府詹事金  
公得疾明日強入朝退疾劇又明日卒公世鄆人自少  
慷慨濶達負氣義壯遊京師遂遊齊魯趙魏以達於北  
京居北京二十年上初舉兵於北平布衣入見署紀善  
遂從征伐明年署長史又明年陞工部侍郎永樂二年  
陞兵部尚書兼詹事府詹事公事上敬慎小心每被顧  
問知無不言退未嘗泄以是益見禮遇而委任益篤焉  
輔導諸君以正直自持言無不盡尤見優待遇同列論

事徑情直發不肯持兩端依阿而虛已服善沛然如決江河注之海也兵部機務繁劇公嘗推讓同官之賢能或一事失當則必自引咎人有片善必稱之雖有素與公異意者其人有他善未嘗不稱也里人有數窘辱公公為尚書時其人補吏來京師懼不為容公薦用之或曰彼不於公有憾乎曰顧其才可用柰何以私故掩人之長尤好獎掖善類士有得一官而往見公者必戒之曰國家待士厚所望為民造福耳所至一以濟物為務

聞人出片語涉暴刻輒艱然色變可謂公直慈厚者矣  
襟懷坦夷神情洒落政務之暇朋徒往來酒一壺棊一  
局詠歌談謔相得也事兄世華盡恭愛撫兄子如子篤  
交誼朋友卒其子無依公為長育之亦有長育之而為  
之娶婦者其他賙貧乏恤喪葬所濟尤多博於史學每  
論當時成敗治亂之故娓娓千數百言不竭其源委曲  
折歷歷如身親覩之者享年六十有三初病且革尚書  
蹇公侍郎盧公往候之問所欲言公曰命至此何言獨

念忠始以一夫見上歷數年位列六卿寵極貴盛而未嘗效分寸之報忠即死能瞑目哉已而顧其襁中兒謂二公曰忠不能報上恩矣士奇必志上所以寵我者銘我庶幾兒長而或有知也計聞上為文祭之有曰殫竭心膂克勤夙夜小心慎密始終無間皇太子為文祭之有曰能盡乃心知無不言助益多矣又曰老成忠厚方資之為輔而遽沒焉嗚呼觀公君臣之際始終一德生榮死哀何其盛也公諱忠字世忠祖漢考文英以公貴皆



贈資政大夫兵部尚書祖妣樓氏妣馬氏皆贈夫人娶  
余封夫人子男一達公沒時達生始六月明年二月兄  
子復初奉公喪歸葬鄞之某鄉某原士奇素辱公知義  
不可辭銘故叙而銘之銘曰

神龍御天雲翕從之千載之會時維昌期金氏之先宅  
於東澗世篤善仁蓄涵未發如種必獲迨公奮興明良  
相逢昉自北京奉天靖難公侍帷幄寅恭慎密畀以心  
腹邦國載寧榮秩顯命爰貳冬官遂掌邦政遂輔儲君

宮臣之首公德多有公存孔厚古之君臣有終不常偉  
公之終隆隆寵光難名如天維帝之恩公沒惓惓庶其  
後人鄧原之墳湖山鬱盤歸焉斯藏永永其安

故中奉大夫山東布政使司右叅政陳君墓碑

銘

陳之先五代時大理評事諱暉自金陵徙泰和始為泰  
和人自宋以來子孫蕃盛皆業儒為詩禮鉅族代有仕  
者由科目進者六十有一人而至士啟士啟諱雷既以

字行遂別字震之其曾祖文瑞元瑞金縣儒學訓導祖  
存道安遠縣儒學訓導父煥章號萍翁母蕭氏萍翁四  
子伯士瞻洪武壬子鄉貢進士興寧主簿仲士悅叔即  
士啟季士勗士啟髫髻時已挺特克自樹立甫十歲從  
學興寧君習詩律已文采英發十二習舉子業治易經  
與朋友論議能自立說不蹈襲未冠鄉大姓延教家塾  
前輩與之辨析史傳寡所推讓父坐累謫遼東中道喪  
其從者士啟聞之徒步走萬里省侍歲餘置居室及共

養百需咸備奉命歸侍母及佐士悅理家事時公府徭役悉論產之殷者陳氏產在里中甲乙數士啟雖少年兄弟協力一心必不肯墮人後時興寧亦坐累謫五開治裝遣人東西寧父兄者常接迹而奉母盡孝養既父兄皆代歸無幾父卒終喪永樂元年興賢詔下邑大夫舉士啟遂選中江西鄉試明年中禮部會試廷試賜進士出身凡進士未授官分隸諸司觀政士啟在左軍都督府時成國公掌府事得士啟懼甚閒暇輒就講論古

大臣賢將所以事君使人之道士啟亦樂為盡誠禮遇  
加厚召入翰林為庶吉士修永樂大典辨博明敏同列  
推其老成翰林編修周述言於朝陳士啟才行有為有  
守超擢禮部祠祭郎中授奉議大夫究習典章謹於職  
事時呂震為尚書屬官謫附者率得近尹昌隆不為謫  
附以罪去之卒擠之死同列以是惴惴士啟獨任直道  
不苟徇或舉尹戒之荅曰人各有命吾恭勤於職以聽  
命耳枉已媚人以求容不能也呂雖惡之卒不能害丁

內艱去服闋還舊職無幾陞山東布政司右叅政士啟  
寬厚愛民於事必盡心而襟宇濶達不察察以為明不  
苛急以責效待下常采其所能而舍其小過妖婦唐賽  
兒惑衆為亂坐失覺逮繫數月釋復職數行所部督徭  
賦不嚴期約民得自便故事集而不擾青州歲歉郡具  
饑民之數上聞朝廷遣使偕士啟如數賑之粟比至而  
饑民之數倍增使者議再奏俟報士啟曰民命在旦夕  
若再奏俟報旬浹間餒死多矣請發奏後即出粟脫有

罪請自任不敢以累遂獨具奏朝廷從之所至民有爭訟郡邑未決而伏馬首以訴者從容數語理喻之皆帖服三載考最賜誥命授中大夫高煦潛謀不軌稍覺士啟適至青州聞之暮夜馳歸語三司同具密奏罪人既得士啟從陽武侯兵部尚書錄其餘黨撫安人民遂同御史給事中清理山東諸郡軍籍之弊姦者無所容枉者賴以直蓋為人果確為政廉平循理而行無所矯拂未嘗務名而所至其民愛之平居友于兄弟睦于親族

處人和易愈久而不變宣德六年八月四日卒於官春秋六十有六娶康氏子男一祚女二長嫁曾貫次嫁梁貺祚本土悅子以姪為嗣孫男二敬放祚奉柩歸葬于鄉先事請書墓道之碑士啟先妣夫人族姪後余生兩月余兩人自卅角以學問相親益又仕同朝相好至老如一日相知深莫如余故勉為之書而係以銘曰

陳出有虞以國為氏轉徙金陵西昌再徙源厚本深派衍支分繩繩振振有德有文林峙詩書星羅簪笏科名



六十震之嗣發石渠天祿纂述校讐人或不足在已則  
優儀曹郎署執勤與敬人或自屈在已用正維東大藩  
齊魯之邦參贊旬宣直道以行翼翼小心雍容大體吏  
服其清民受其祉歷事三聖以臻全歸於戲震之于宗  
有輝凡宗之榮震之始大世德尚隆來續未艾

故翰林侍講學士奉訓大夫曾君墓碑銘

正統辛酉三月二十有一日翰林侍講學士曾鶴齡卒  
於官訃聞命禮部左侍郎王直賜祭朝之公卿大夫咸

致帛祭館閣諸賢加賻贈焉曾君吉安泰和人鶴齡其諱延年其字一字延之以書經中江西永樂乙酉鄉試辛丑會試禮部第二廷試第一賜進士及第此其發身也初除翰林修撰授承務郎宣德庚戌陞侍讀授承直郎正統戊午陞翰林侍講學士授奉訓大夫此其歷官也初偕同官修天下郡志未竟遂預修永樂洪熙實錄又修宣德實錄悉心纂述事必究實無虛譽無曲貶嘗同考禮部會試又考京畿鄉試咸致公選始鄉試初場

畢執事者不戒火焚試卷三之一有司苟且惜費欲遂  
試後二場而竣事焚卷者罷不復試延年不可曰焚卷  
豈皆其下者罷之何以壓士心且朝廷以得士為重豈  
惜一日之費必更試有司具二說請旨卒從延年遂別  
命題試士論大服奉命代祀神農虞舜之陵及南岳咸  
嚴誠敬此其所治職也平居惇孝友初與兄椿齡同中  
鄉試獨留養親椿齡赴會試遂登第為翰林庶吉士無  
幾卒延年歸葬之而教誨其遺孤男女有成長皆為之


婚嫁於待寡姊孤甥皆厚此其行之著於家也為人和厚易直交際以誠表裏不二發言處事公而不私能以義正人亦樂受善言雖嫉邪惡而辭氣雍容小人不怨此其發諸已而施諸人也幼嗜讀書長益勤勵默識講析經史通貫其學也形諸著作和平簡潔明理為務不事工巧有詩賦序記傳銘贊若干卷藏於家其文也誨人必先德行而文藝次之若誨人於文必導之經術使尋究旨歸後多成名其施教也曾始居金陵自唐光州

團練使慶之孫延構避五季之亂徙西昌五世至孝子  
肅四子俱起科第自是而子孫益蕃其先所自也又十  
世至元瑞金教諭約其曾祖也洪武中沔陽黃蓬湖官  
九韶生贈翰林修撰伯高其祖及考也封太安人胡氏  
其妣也陳氏興寧縣簿士瞻之女封安人其配也五男  
長序舉進士授行人司行人次廩選鄉貢次應次庶次  
庾二女長嫁胡仲璇次嫁嚴時其子也八男四女其孫  
也旦入侍朝退即館閣偕其僚談論閤閤莫歸得痰疾

遽不起其屬纊日也自癸亥至辛酉五十有九年其壽也西昌某鄉某原其葬也重交游之誼序其事行世次之槩使刻置墓道其察之長士奇也序行於墓必有銘古之制也銘曰

西昌文獻有鄮氏唐之季葉繇昇至後有孝子宋盛際四男彬彬五擢桂厥嗣振振顯不匱司教瑞金沿十世迨其曾孫奮勵志明經射策起魁第戎冠褒衣陟近侍承明延閣聯俊乂石室金匱述有繼恪單乃心釐乃事

庶明于道正于義叙勞稽勛進祿位奄其歸全靡忤愧  
歸乎斯丘太史志式祇承續在來裔



東里續集卷二十七



欽定四庫全書

集部

東里續集卷二十八

詳校官檢討

臣

羅國俊

中書

臣

劉源溥覆勘

總校官進士

臣

楊懋珩

校對官庶吉士

臣

嚴福

謄錄監生

臣

陳瞻燧

欽定四庫全書

東里續集卷二十八

明 楊士奇 撰

墓碑銘

懷慶知府李君墓碑銘

河南懷慶府知府李君正統四年七月初七日卒於官  
既歸葬泰和千秋鄉羅園之原又明年其子誠奉翰林  
侍講余君學夔所述事狀走北京求書墓上之石余今  
年七十有七衰倦甚顧尚縻公務日勉強不前乞退而

未得而何能應人之求故有求者率力辭卻雖愈且怨  
不恤而誠懇懇求不已則又念李君持身愛民吾邑之  
卓卓者且素厚不忍固辭李氏家泰和西郭文溪之上  
其曾大父宗明大父雲龍父又新有孝友之行母蕭氏  
李君諱湘字永懷自少端重謹飭嗜學入鄉校從師授  
春秋經業成上北京大學永樂中選歷刑部都察院以才  
能稱擢東平知州斷斷以持已愛民為務常祿外非其  
義一無所苟取而勤於公旦莫治事不少休視民如子

訓之勵之諄諄無厭倦意非甚悖不輒施笞罰徭役必  
驗力厚薄民皆悅服州城之東有大村壩源出泰山雨  
溢數為民患奏發民丁築防捍之患乃已州及所轄五  
邑地曠多蕪廢課民墾闢倉廩充牣歲歉賑貸咸有備  
祀典祠壇公府廨宇整飭一新增修學舍明教化有稱  
齊魯之間前之為守者得罪去後以宥復李君用名還  
民懷之不置羣訴於朝請復之車駕征北邊詔山東西  
民隨軍給餉運道遠多死亡李君率東平民行撫綏有

道訖完民以歸在東平十餘年始終一致正統初詔廷臣舉郡守禮部尚書毗陵胡公舉李公遂陞懷慶知府命下東平之民爭輓留不可扶老攜幼涕泣送數十里外既至懷慶一用所以治東平者治其民民欣欣戴君如父母懷慶有兵衛素挾勢厲民李君隨事裁制不動聲氣而兵帖然不敢以肆在懷慶三年郡人以安上下交譽之無間言李公惇厚溫裕孝友如其父處人以誠能赴其急不以貴賤貧富而移所守嗚呼今其已矣其

享年五十有七其配朱氏其子男四誠讚諲諄女三蕭  
鸞劉載言朱麓其婿也孫男三珽玘珢銘曰

為士所本曰持其身為政所重莅民有仁溫溫李君執  
德靜嘉履謙蹈恭悃幅無華學成而仕遭時奮庸一州  
五邑董治郛邦顙顙夙夜求民之莫導民之勤莫息蚤  
作尊卑長幼教民以禮務善去惡俾民承祉躬廉舉正  
表率于下休聲洋洋洽于齊魯聖明急治察最陞秩懷  
孟名邦古二千石治教所被三載有成民之戴之懷鄆

一情不逮下壽噫其已矣循良之規靡愧前史江山盤迴故鄉有墳後欲求之視此刻文

禮部左侍郎章公墓碑銘

正統二年十二月初四日行在禮部左侍郎章公卒于位訃聞賜祭命有司具舟還其喪且營葬事自公卿以下皆致祭將以明年某月日葬先事其孤瑾奉翰林侍讀學士李君時勉所述事狀求書墓上之碑按章氏世家會稽高祖斌宋景定中舉鄉試第一人曾祖某祖某

妣某氏考某妣某氏公諱敞字尚文質庵其號自幼穎  
敏嗜學稍長駸駸有立志父母及鄉閭長老皆遠大期  
之文學日有進永樂癸未群試於鄉擢詩經魁明年登  
進士第選為翰林庶吉士與曾榮等二十八人同奉詔  
進學文淵閣恩寵隆洽為四方學者所歆豔文學愈益  
進與修永樂大典壬辰擢刑部江西清吏司主事授承  
直郎究心獄事夙夜式勤雖時繫囚繁理決無滯推情  
處律必協于中復召至北京入翰林修四書五經性理



大全書遂留行在刑部西山有劫盜詔捕之急捕者掩  
執行路數百人以聞上命刑部尚書覆訊如實悉斬以  
徇尚書以付公訊公悉辯其枉惟一人實盜以聞遂誅  
盜而盡釋枉者都城外迫莫商人數輩投止道傍何千  
戶舍夜有盜劫商人商人疑有所為將聞於官何不能  
明即自經死事聞詔五城兵馬捕盜如三日不獲盜兵  
馬坐縱盜罪既三日不獲兵馬懼遂搜索何隣比廿餘  
家得鈔數萬緡即執隣為盜送詣刑部公驗鈔悉非遠

來者且無他物以詰兵馬兵馬具實對廿餘家悉得釋  
陞本司員外郎授奉訓大夫遂陞郎中授奉議大夫無  
幾丁外艱服闋改吏部考功郎中考覈公明小人不便  
造謗鰈之訖不變洪熙中賜誥命追贈其考為考功郎  
中封其母太宜人無幾丁內艱歲餘起復改驗封郎中  
遂陞禮部右侍郎授嘉議大夫安南耆老奉請命黎利  
權署國事上從之特命公及通政徐琦齋詔命利且撫  
綏其國人兩人皆諳大體熟故事雍容有度既至宣揚

德意舉國忻戴而敬禮有加將行且厚致饋金珠香繒累百計悉卻之利等跪請再三曰小人事大之常禮也非假此無以將下誠願不為黷曰吾輩奉天子命來用輯寧若等惟事上如事天保下如保赤子永終不渝可也貨賄將誠末矣竟卻之一毫無所取利遣使人奉表及方物隨公等詣闕謝且密附所饋物令奏以納公等而不令公等知也行將出竟其從有泄之者公兩人索其裝得之歎曰若聽其所為即吾輩外卻而內欲也遂

取封識授其邊吏俾歸利還賜詒命贈其祖若考皆嘉  
議大夫禮部右侍郎祖妣妣皆淑人黎利死朝廷以公  
奉使不忝再命齎詔命利之子麟署國事及境其邊吏  
識公者舞抃拜曰天朝子育下邦不受金大人齎詔復  
至矣奔走豫告麟凡所以迎奉禮益恭其歸而秋毫無  
受如初至既還前之嗣封晉王者以罪廢已革其護衛  
衛之廬舍土田護衛軍先以徙戍邊惟存一千嗣王得  
旨索有司悉歸廬舍土田有司奏言子民已久若悉歸

之當敎三萬餘家之居佃且今惟一千軍無用悉歸上  
命公往審度處置公至言於嗣王曰今陛下臨御惟恐  
或有一人失所殿下以至親受藩屏之託必同此心若  
徇千軍之欲而失三萬餘民之心臣知殿下必不為王  
意解語公曰吾惟侍郎之從公遂計畫而分之於是一  
千軍咸獲足給三萬餘民家不覺有損皆悅歸轉左侍  
郎公在禮部尚書胡公政尚寬大公以嚴肅佐之同德  
協志相與共濟公於吏欺雖小不恕遇弊事必言於胡

公商計草之程督庶務恒盡心焉曰吾為佐其道應爾也為人明敏疏達遇事能果不肯媿媿依隨敬老禮賢交友以義其友有過能面直之或困於憂患極力援之雖數無厭所居好植花卉閒暇焚香閱簡冊臨古法書而已一日夙興朝參道中風疾驟作輿歸是夕卒享年六十有二元配葉氏先卒再贈至淑人繼室趙氏封淑人子男五璫瑾正統元年進士璠璣璩女一嫁錢康孫男一恩女四公為庶吉士時於士奇往還久而益親嗚

呼於今已矣銘曰

章世儒家有聞自宋大比賓興褒然魁貢迨公嗣奮在  
今聖朝振其聲光式閔以高延閣承明益廣其學爰屬  
司寇贊理于辟致明與慎夙夜靡遑念彼古人死獄求  
生聽詞審情以覈枉直無枉弗直平反多績轉遷考功  
卓特持公不以譽毀而易其中升貳春官祇佐三禮秉  
乃直清亦嚴治紀再使南交將命允宜行橐之旋不增  
毫絲有猶有為秩秩條理歷官四朝必終如始既全以

歸無忝斯文史銘其墓用諡來昆

故奉直大夫右春坊右諭德黎君墓碑銘

右春坊右諭德黎君以正統二年十一月謁告歸清江  
得疾卒于家其孤統以翰林侍讀習嘉言所狀事行求  
書墓碑余聞而哀之曰嗚呼黎君之擢第也為良進士  
入風憲為良御史於長民為良郡守於近侍為良輔臣  
奈何遽止於斯乎黎之先見余所作其考墓表其曾大  
考允誠大考惟琇考宗瑞妣鄒氏以君貴考贈右春坊



右諭德妣贈宜人君兄弟三人其季即君諱恬字潛輝  
天資清淑生六七歲知慕學問累從明師得其旨歸而  
自進其功永樂壬辰擢馬鐸榜第二甲進士無幾丁內  
艱去服闋除陝西道監察御史以正直揚風裁歲辛丑  
朝廷以災異求言群御史同上奏實君具草歷詆大臣  
之任事者無憂國恤民之心剴切激厲無顧避上曰御  
史言是任事者不能堪後薦御史之才可用於上皆陞  
知州而處之遠方君得交趾南靈州尤僻遠君怡然曰

聖人不鄙九夷我何人哉既至教愛其民如子民皆父  
師事之政化既行會黎利反其衆日盛總帥王通孱弱  
不能制為吏所脅遂矯制勒三司郡縣官吏悉解職守  
隨通北歸君時在行既歸通及協謀者皆坐法朝廷以  
事不出於衆悉置不問宣德七年士奇率同官言黎恬  
文學操行可任近侍遂命為右春坊右諭德授奉直大  
夫時春坊事簡奉旨入翰林與纂述考最賜誥追贈其  
考妣預修宣廟實錄簡充經筵官奉命考禮部會試者

二用心公正時多得人遂謁告歸展先墓賜道里費給  
驛舟既展墓樹碑墓側退而洽其親戚鄉里懽甚將行  
得疾醫藥久弗效以正統三年正月廿二日卒享年五  
十有一君篤孝友之行而磊落有大志恥屑屑流俗事  
學博而正論議沛然為文章波瀾藻麗而根於理存心  
公平於論人之邪正事之枉直靡不服之盡心公務未  
嘗苟且非其人弗與處容色潔白如玉儀度恭肅人不  
可犯而雅度洒落良朋勝友卒然邂逅詩酒倡和酬酢

率極懽而罷其藏脩之齋名熙熙所著有詩文集若干卷  
其娶先教氏贈宜人繼王氏封宜人子男四統縉頌生  
顯生女二傳徵賢羅某其婿也孫男二昇生冕生其葬  
以卒之歲某月日葬在某原與教宜人合葬焉黎君余  
考禮部會試時所取士又以同鄉故相知深而相與久  
其仲兄慎兄子經皆有文學於余往還余嘗謂清江自  
劉氏公是公非而後有一家三人聯璧輝映者今再見  
於黎氏居無何慎卒經又卒黎君每向余道其兄與姪

未嘗不泣下余亦為之感歎豈意又於今哀悼黎君哉  
銘曰

清江之黎代襲詩禮繇淦三洲徙版城里自其高曾潛  
德弗揚迨其大考武弁奮庸卓卓潛輝篤志問學升自  
賢科秋空鵬鷲鐵冠白筆北面在廷用振憲紀用張國  
經觸邪指佞動植有知昔之所學今惟行之既斥遐僻  
俾治夷類不賤鄙之躬勤撫字夷亦有心曰我仁侯父  
之母之而肯以尤既陞桂芳所職輔導詞苑經帷在帝

左右方將顯庸曷遽殞亡松栢中仆不至柱梁嗚呼潛  
輝其藏我銘後有考微庶其猶生

故通議大夫資治尹吏部右侍郎鄭君墓碑銘

國家罷中書陞六部吏部所職簡用賢才考察政績而  
進退之為治平之資故士大夫非明且公不足以稱吏  
部之任蓋吏部得人而後百司可望得人百司得人而  
後民生可望不失其所吏部所係豈細故哉盱江鄭誠  
文實為吏部侍郎十餘年殆其稱吏部之任者歟宣廟

臨御於用人尤甚重廷臣三品以上有闕必命衆僉舉  
又勅吏部凡方面郡守闕令廷臣三品以上各舉所知  
吏部審其當否始奏授官蓋堯舜用人之道也文實前  
後所舉數十人悉副輿議其於中外諸司政之得失才  
之高下行之邪正博知悉識尤熟典故上前間有顧問  
敷奏詳明無所遺失雖由久在銓司亦其存心之正用  
意之專也於調官必度務之繁簡才之稱否而處之治  
公事必循舊章於贊黜陟率公家宰所倚任焉馭下吏

不威而嚴下亦莫敢欺之或有乘間為欺者輒覺之召諭使改不輒加罪大官中貴有所干凡不可者必從容以理對不肯苟徇親故有干弗得者造誣騰誹以螻之知之弗校蓋其為人明敏敬慎和厚果毅恕而有容也鄭氏盱儒醫家宋季其先號仁齋者嘗為撫州儒學教授高祖禎仕元為撫州醫學錄曾祖銘洪武初歷彭澤南陵二縣典史祖瀚遠父守中皆隱處母王氏繼母傅氏文實自幼秀穎嗜學甫十歲監察御史行縣察試嘉



之舉為邑學生從明師授春秋弱冠選中江西鄉試遂入太學充監生為祭酒胡公所愛恒侍左右年廿四擢吏部司務精勤職事已起聲譽陞考功員外郎授奉訓大夫丁內艱服闋改文選員外郎兩司郎中雖老成自居然皆服其能而德其助陞文選郎中授奉議大夫洪熙中賜誥推恩封贈其父母五品宣德初陞吏部右侍郎授嘉議大夫居官恒四鼓興朝退即坐公堂底莫治職務雖事叢脞而條理井井且益自淬礪其譽益重贈

封其祖父皆嘉議大夫吏部右侍郎祖母母皆淑人遂  
進通議大夫資治尹文實事親孝親癢必色憂母沒哀  
毀友諸弟待臧獲有恩事師如父師沒厚禮其家交處  
以誠有淪落憂患極力拯之遇名賢子孫率異視之宋  
高宗賜呂頤浩御札流落民間文實識為前江西僉憲  
呂升故物歎曰此世之寶也購以歸呂所行槩類此春  
秋四十有九而卒訃聞上悼歎命禮部賜祭有司營葬  
朝自公侯師保尚書暨御史近侍六卿之屬率往吊祭

其興阜及所居閭巷細民皆嗟咨惜之亦有流涕者初得疾遽草醫罔效家人憂驚蒼黃將叩道家者祈禳文實厲色曰生死命也吾素行可無忤何事於禳遂止獨以親老不得終養自慟語不他及是夕卒正統三年十一月一日也前五年有推人始生年月日辰以決壽者言文實歲行及午應止噫信其命矣夫其配黃氏封淑人子男一屋女一皆幼卒之明年春將歸喪葬其鄉黃氏使屋奉刑部侍郎何君文淵所述事狀來拜請墓碑

余與文實同大江之西又同朝久故叙而銘之銘曰  
鄭出姬姓以國氏代有文獻昔聞世天建皇明啟隆治  
選賢任能布列位天官實重鑑衡寄厥卿暨佐必簡畀  
文實起盱秀出萃明經入官卓尚志三奮崇陟冢宰貳  
致勵夙夜敦勅愍庶士濟濟升以彙審厥臧否稽所事  
致公與明平不陂曰進曰退中以制厥所推轂必既試  
溫溫處物色不厲弗嫵弗迂一循義曷遽奪之弗弘施  
嗟其全歸靡忤愧佳城鬱鬱盱之溪後欲考之此其槩

贈嘉議大夫刑部右侍郎楊君墓碑銘

杭有君子曰楊孟潛沒三十年其子刑部右侍郎寧以前翰林侍講匡南余鼎所志墓文告余曰先君受追贈恩至三品法得立碑於墓敢請刻辭余聞孟潛之行於士君子矣又與寧同朝厚善為之序曰楊本沈氏世家杭之錢塘業儒元杭州路學教授某既卒其子壽之始生母楊以鞠于舅氏遂蒙舅姓生德文配傅孟潛之大考妣考妣也孟潛諱昇自幼凝重不凡天性孝友髫齡

已立志學問而旦暮侍養不去親側得親之惟一弟篤  
愛之終身洪武丙子以春秋選鄉試明年會試中副榜  
授教諭星子縣年甫二十餘惇持師道端威儀明講說  
自旦達夕躬勤弗懈言動雖微不苟屹然類老成人學  
者翕然服從前庶子廬陵鄒緝方正不苟許可時佐教  
星子獨加禮孟潛道譽之不置口星子學賢科累歲不  
薦士郡邑及學官惑於堪輿家言學地不利謀徙置孟  
潛適至毅然曰學業至未有不薦者竟不徙其於學者

誘掖獎勸忠愛懇到久而彌篤三年學薦二人又四年薦四人皆登第自是科不乏升九載考績陞邵武府學教授無幾調徽州府學施教一如星子所至諸生皆從授春秋大比而升者比比善教之效有聞於時其為人純實和易服用儉素非道之言未嘗出口與人交悃款言出而信其去也皆思之久不忘平生以事親為切要得祿必迎就養有欲以理民薦之者力謝卻曰今幸在散地旦夕獲侍親側而柰何欲奪之乃止永樂甲午留

北京以疾卒卒時老親及妻子皆在徽甚貧惟以不獲  
終養為憾徽人聞之為築室學舍之側以處其家非積  
行之誠有以致之乎卒於是年十一月晦享年四十有  
三葬錢塘之花家原以寧貴累贈至嘉議大夫刑部右  
侍郎嗜為文章詩雅淡近古所述有拙齋藁春秋正義  
藏於家配袁氏封太淑人子男二長即寧舉進士擢官  
刑部主事陞郎中用佐武功陞刑部右侍郎次宜女二  
長嫁監察御史劉安定次嫁某孫男若干銘曰



行莫先孝顓顓厥誠道貴善教羣才以成忠厚之存平  
直之行天有報施身後淳榮有赫嗣興義冠在廷振華  
履亨既崇以閔錢塘之原歸展先塋貽後樹碑太史之  
銘

贈嘉議大夫工部右侍郎周君墓碑銘

宣德五年上命越府長史周忱為工部右侍郎賜璽書  
俾巡撫南直隸蘇常諸郡兼董其饗事忱單心畢力靡  
間夙夜上有資於國用下有及於民生三年賜誥嘉獎

而褒贈其考為嘉議大夫工部右侍郎於是忱以禮部  
侍郎章敞所述其考府君事狀求余為銘將勒石于墓  
余與府君生同歲居同郡又與忱有同朝斯文之雅不  
得辭府君諱森字秉昂周之先會稽人唐御史中丞勅  
率兵討黃巢留鎮九江子孫因家焉七世孫太子詹事  
世修徙南昌之武寧又四世至宋敷文閣學士友賢五  
世不分詔旌其門其子兩浙宣撫汝翼汝翼子瑞州知  
府應合應合子天驥元吉州路總管贈江西行省叅知

政事追封廬陵郡公又因家焉郡公五子長橫州路治  
中諱志道府君高祖也曾祖忠州判官諱圭祖南康路  
知事諱鑑父諱潤世稱遺安先生時重其學行元季避  
兵亂於吉水之月岡又因家焉母李氏知學有德善遺  
安年四十未有子脫服飾為取側室黃氏生府君幼讀  
書警敏有立志成童綜理其家事井井間出長里徭賦  
邑大夫重之壯而襟宇闡豁才器充偉有司屢欲薦用  
之輒以親老辭而奉養克孝親疾躬治藥食不去側者

累日親沒哀毀歲時恒謹祀事嘗改厝所生母舉柩過門將奉置堂中行祀禮姻戚中泥陰陽家忌者交尼之府君曰人子事死如事生安有親過門而不入家者脫有禍森不悔女兄沒諸甥皆客遠外喪葬悉自己出妻之母卒未有葬地即出地葬之或言此地大利後人柰何推畀異姓府君曰苟可利後在彼猶在此也與人交悖信義喜賓客觴酌譚論雖終日不倦負直氣有過者面折之然能為人解紛排難而庇其鄉里有造偽鈔者

事覺而枉逮其里人力為白之於官近鄉嘗有盜劫掠富家里中無賴亦動心潛結將發府君察知徧詣諭之禍福曰彼劫紋者即朝莫為魚肉若等寧可效之耶又召其首謀者閉於家得不發不旬日官盡捕近鄉寇戮之而沒入其家里無賴者皆詣府君叩頭謝曰微公我等悉以寇死矣蓋里人賴其惠者非一嘗舟行舟中人失物疑同載者竊將執送於官府君曰此疑事即為代償數日得真竊者失者大慚府君平居樂積書教子忱

初習舉子業手錄前輩名人程文成帙授之為式忱舉進士奉詔進學翰林日有長益暨擢刑部主事進員外郎有廩能名府君喜屢至京視之而加勵焉府君於學通其大旨旁通醫卜尤嗜郭景純葬法有困於窆者從府君求吉地改葬其親蓋冀免於窆府君曰吉地非可求苟有善行將自遇之其操術如此洪熙中以忱貴封奉議大夫越府右長史忱奏分其祿之半於鄉以養宣德六年九月廿二日卒禮部以聞命進士甘瑛賜祭春

秋六十有七配龍氏元義兵叅軍復皋之女有賢行先  
廿七年卒繼胡初贈封皆宜人龍後進贈淑人胡太淑  
人子皆龍出男四忱恂恪怡恂先卒二女長適陳行恭  
次適蕭肇成孫男八女八曾孫男五女四府君之葬以  
卒之明年四月廿九日合於里仙獅石之南龍淑人之  
墓銘曰

繫周之先顯有闕闕昉越徙洪又轉徙吉吉守桓桓斯  
文攸尊吉人德公永言耐軒公之桐鄉青原白鷺公之

子孫逢掖章甫始來月岡公四葉孫晚際承平于丘  
樊月岡再傳曰秉昂甫才足剗繁知足達務韜卷弗用  
逍遙徜徉厥有譽聞施家暨鄉有偉嗣興揚于明庭秉  
志攄誠貳冬卿上禪朝家下惠黔首帝曰俞哉疏恩  
父母歲歲丘墳有石麗牲述行載榮爰勒斯銘

太史吳先生墓碑銘

先生諱勤字孟勤姓吳氏其先自大梁徙荊州至箴官  
南康遂家匡廬之陽至哲為永新簿又家永新其曾祖



諱原道祖諱文振考諱師尹元名進士為永豐丞母龍氏一夕夢紫衣大士寤而先生生幼穎異五歲知慕學七歲日讀數千言成童四書五經皆成誦未冠為文章下筆濡然而必根於理未嘗苟作永豐君經學擅名大江之西先生與弟仲謹皆負才氣英邁傑出人稱吳氏二鳳先生有志科第鄉前輩咸期必中永豐君曰吾老矣乃不果行永豐君捐館元政日隳所在寇盜充斥先生歎曰世若此吾可坐視耶乃列弭盜數策往告吉安

守臣納蘇羅丹納蘇羅丹知禮先生而不能用去之而  
州里寇盜益甚往避于洪居無幾偽漢兵圍洪有欲薦  
先生于行省平章多通者先生聞而止之曰此人已無  
固志明旦多通果遁城陷先生趨間道歸鄉里國朝兵  
下吉安紀律嚴肅先生曰此真吊伐師也往謁其總帥  
時淮南郭子章叅謀幕府相得懽甚署先生官太和不  
就洪武初詔下興學徵儒師郡舉先生中書考經義第  
一奏除武昌府學教授嚴師道正學規訓勵諸生多成

才者如中書叅政方彛國子祭酒吳啟皆出其門居數  
年先生援例去官楚昭王聘為諸子師而賓敬之先生  
非周孔之道不陳故禮遇久益厚永樂初召修太祖高  
皇帝實錄先生明故實謹書法時推直筆書奏賜白金  
文綺改教授開封府學施教如武昌周定王亦厚禮之  
至開封之又明年以疾不起永樂三年二月二日也春  
秋七十有六定王遣官致祭藩憲大臣及郡太守以下  
皆躬祭諸生哀慕不已明年歸葬于鄉先生孝事父母

恭愛兄弟教育孤姪如子其曾次明淨矩度雍容不嚴而肅其學無所不究喜道誘後進恒盡底裏士子咸樂親之非聖之書不以教嘗見學者玩揚子太玄文正色曰曷不究心孔孟哉取予以義在楚府日蜀獻王湘獻王皆遣使奉書幣致願見之意廣西藩憲亦請主鄉試文衡先生歎曰楚國待我厚古賢王禮士不是過也我豈當外交一切謝卻湖廣行省叅政吳雲於先生故相好雲卒於官二子貧不能歸先生扶持之使立又教其

仲子學凡於親故及名賢之後汲汲獎借於利雖微不苟取初罷教授歸諸生奉贐一芥無所受曰諸賢惟勉進不懈即勤受惠矣處物和厚人片善揚譽之不置未嘗啟口及人過失至論事公是非不肯嬖姁依隨憂人之憂急人之急常如不及喜賓客至者未嘗以空匱廢禮閒暇時誦佛經學者疑而質之先生泣然曰先夫人遺命也非敢徼福楚府紀善貝翱聞之歎曰朱夫子所記尹和靖之孝也先生不忘其先自號匡山樵者晚更

號凶翁文章渾厚雅則所著有匡山樵者集六義齋集  
鶴山集若干卷藏于家配孺人蕭氏淑慎慈惠式勤內  
助先十年卒子男一善存女一歸胡光大孫男三耘耔  
耕曾孫男六士奇甫冠拜先生於武昌往還七年深辱  
教愛後同在史館旦暮益親密將赴開封所以命之者  
甚厚未捐館先十日書來示訣別之意而訃踵至矣嗚  
呼儒師老成世豈復有吳先生哉時先生之甥胡君光  
大述為行狀而約解君大紳銘墓余書墓上之石獨余

久未及為今年善存走六千里外趨余皋緩之罪尚可  
聞乎敬叙而為銘銘曰

凡士求道於先覺師惟先覺明為龜為著猗嗟先生研  
深函博秉義蹈仁表厥儀則遭時孔屯心急拯焚匍匐  
有言彼瞶罔聞大明麗天光被四表嘉重有道升泮以  
教濟濟兢兢來遊來歌相廷賢關蜚英振華奕奕親藩  
河間行治秩秩賓筵仲舒正誼廼趨召命廼職史書春  
秋之志式嚴褒誅陽煦霜肅表裏不間有德有言斯文

冠弁璞玉在山草木承輝嗟乎先生曷不憖遺先生之  
藏其封六尺永懷先覺過者必式

故奉議大夫鄭府右長史賴君墓碑銘

正統六年八月十五日鄭府右長史賴君沒於家其子  
翰林編修世隆縉經奉監察御史薛希璉所述長史君  
事狀求余書墓上之石賴之先自江右徙汀之清流世  
有科第襲厚德高祖諱寧曾祖諱霖祖諱季宗考諱福  
興皆持行不仕長史君諱添貴字景望晚號澹菴生時



而孤母陳育之訓之長而悟解穎敏從學縣博士兼通書春秋禮經工為文章永樂乙酉選鄉貢明年會試禮部中教官選授浙江麗水縣儒學教諭九載以績最陞教授需闕言於朝願仍就教諭從之除仁和縣學九載績又最當陞諸生列狀乞留會簡陞鄭王府伴讀侍王之國鳳翔每長史缺即命君署其職事鳳翔學者率從之受經其仲子世隆官翰林恩典得封父母君既援棄職就封之例上重其去即舉奏為右長史從之授奉議

大夫無幾丁內艱去既服闋以疾終於家享年六十有二君為人坦直存心忠厚孝於親友於兄弟睦於宗戚誠於交友以恭遜居鄉黨以詩書行義成其子以致知力行勵學者而施教孜孜不倦恒躬率先之學者後多由科目升擢要官有名于時其待諸生如子有為怨家誣搆郡守惡其抗直將黜為吏者君力為直之有負官租不能償者倒囊代之償前官所收廩米歲久腐壞有司責民之守廩者償民窶不能償將自經君捐已俸代

償益於排難解紛周急濟乏率謂當然其在藩府也從容正道隨事獻替甚為王所重平生利一芥不苟取處事必當理朋友死無所歸盡禮葬之隸人啟土築垣得白金一器有告君請分之者不聽惇義遺利槩類此其學有本源未嘗惑於老佛邪說所著有經義若干篇古文若干篇詩若干首存於家其配曾氏子男五長世昌次世隆宣德庚戌進士擢官翰林次世安次世和次某女二長嫁王瓘次尚幼孫男十其葬以正統七年墓在

其邑某原銘曰

縕仁積厚逢掖世振振繩繩續續繼蚤孤克奮卓特志  
上探虞周究洙泗扶隱闡興發經義黌宮坐正皋比位  
訖訖童冠左右萃講道授業開蒙蔽聃肝疊疊殫勞勩  
聲實茂起光昭矚親藩毗輔式簡畀懷忠瀝誠秉正議  
匡直視古靡忤愧內篤孝友推施濟凡諸士行殆乎備  
既沒而寧此其竊銘以表之太史氏

東里續集卷二十八